

# Titogât ekap Paulonâ kulemgum pindip.

Sâm muyamuyage den sot mâsop den.

**1** <sup>1</sup>Paulo nâ Anutugât kore a sot Yesu Kristogât Aposolo orâwan. Zâknâ gâsunimnâ zorat nep diŋ sâm nigip. A ambân Anutugât siŋgi sâip, zen den bonnâ nângâm, nângâm pâlâtâŋ kwâknangâbi sot diŋâ lubigât nep zo sâm nigip. <sup>2</sup>Oi ândiândi kâtikkât siŋgi den, zo bonnâ. Anutuŋâ sarâ mân sâmap. Zâknâ mâruman hân mân muyageibân itâ sâip, “Ândiândi kâtik zengât siŋgi sâm kâtigian, zorat mambât ândibi.” <sup>3</sup>Narâk mâte oi diŋâ zo sâm muyagemnâ Anutu kubikkubikziŋandâ nânâ sâm muyagibatkât nep diŋ sâm nigip.

<sup>4</sup>Nâ sot siŋgi âlip mem ândiet, Tito, gâgât ekap zi kulemgum gigan. Anutu Ibâ sot kubikkubikniŋâ Yesu Kristo, zekâren gâbâ um lâklâk sot um lumbe zo gâgâren zimbat.

Galem a sot a sâtŋâ, zengât den.

<sup>5</sup>Nep torennâ ziap, zo tuum nangâbangât op Keret hânân gâbarâwan. Oi dâgowan yatik Yesugât kâmut kamân dâp galem a gâsum sâlâpzângoban. <sup>6</sup>A nâi, zâk tosa buŋâ, ambân kânok sot pâlâtâŋ op ândibap. Oi nan bârarâp zen den siŋgi âlip mem ândibi. Nan bârarâpnâ gulipkukuŋ sot zâizâiŋ buŋ ândibi. A yatâ zo nebân zâmbanban. <sup>7</sup>A sâtŋâ nâi, zâk Anutugât nep a ândimappâ tosa buŋ ândibap. Zâk zâizâiŋ mân upap. Kuk laŋ mân upap. Too kâtik nem um gulip mân upap. Kâmbam kukuŋangât âknâle mân upap. Kât sikumgât âknâle mân upap. <sup>8</sup>Zâk a buku otziŋgâm kut nâi nâi âlipnangât âknâle nângâmap. Sâkkât âknâle mân nângâbap. A târâraknâ. A hurat kwatziŋgâmap. Sâkkât kendon ândibap. <sup>9</sup>Den bonnâ sâm dâzângowan, zo dâpnan mem ândibap. Oi zorâŋâ imbanâ pindi den bonnâ âlipnâ a kwâkâm ziŋgâm ândibap. Oi Kembugât den ku a, zengât den mem ge kwâpap.

Den ku a sot sarâ a.

<sup>10</sup>A donbep zen zâizâiŋ op ândime. Zen den yenŋâ sot sarâ sâm a um gulip kwatziŋgâme. Yuda a kâmurân gâbâ a nâmbutnâ umziŋ patâ

Mosegât den sîngi sânginjan ari sâkñandik Yesugât sîngi nângâme, zen zo yatâ op ândime. <sup>11</sup>A zo kât sikumgât opnâ den sarâ sâm a nâmbutnâ ambân murârâpziñoot zo um gulip kwatziñgâme. A yatâ zo, zengât lâuzinj doongunat. <sup>12</sup>Keret a zengât den sâsân a nâinâ itâ sâip,

“Keret a zen sarâ sâme. Zen a konam op nalem nemñik ândime. Zuu bâlij yatâ kut nâi nâi lañ nime.”

<sup>13</sup>Den zo nânga bon uap. Zorat ko den kâtik dâzângona sîngi âlip târârak mem kâtigem kinbi. <sup>14</sup>Zen Yuda a zengât den yennâ sot den ku a zengât den zo mân nângâbigât girem dâzângoban.

<sup>15</sup>A um salek ândimeñâ kut nâi nâigât nângâne salek opmap. Ka a nângâm pâlatânziñ buñ, zen nângânângâziñ sot umziñ sumunkoi kut nâi nâigât nângâne mân salekkomap. Wangât, umziñ sumunkoip, zorat. <sup>16</sup>Zen itâ sâme, “Nen Anutugât topnâ nângâmen.” Sâtñak yatâ sâne orot mâmeziñâ kwâimbâmap. Zen bâlij mâme a. Den kukuñ a. Anutuñâ ziñgiri tepbâurep opmap. Den ku a zo, ziñ âlipñangât nep mân tuume.

#### A ambân patâ, zengât den.

**2** <sup>1</sup>Gâ ko den âlipnâ ziap, zorat dâp dâzângom ândiban. <sup>2</sup>Oi sânanâ a patâ ziñâ kendonbandon sot hâlâlu ândibi. Umziñ bimbi kwapi. Nângâm pâlatân sot buku orot zo mem kâtigem kinbi.

<sup>3</sup>Oi ambân patâ zo, zen yatigâk dâzângona sîngi âlip nângâm sarân mâme sot den umân pâpan mân sâmñâ too kâtik lañ mân nem ândiândi âlip zo wâratkum ândibi. <sup>4</sup>Oi ambân sâk wâgân dâzângone ap murârâpziñ galem otziñgâm birañbi. <sup>5</sup>Oi añun op lañ mân ândibi. Kendonbandon op mirin kut nâi nâi kubikñâ abârâpziñ sâtziñ lubi. A kândâtñan ândie zo, ziñâ ziñgitiñâ Anutu sâm bâlij kwapegât yatâ op ândibi.

#### A sigan sot kore a zengât den.

<sup>6</sup>A sigan yatik sâna kendonagom ândibi.

<sup>7</sup>Oi gikak kut nâi nâi âlipnâ zo op mâtâp tirâpziñgona eknâ yatik upi. Sâkñak mân tuuban. Kembangât den zo târârak wâratkum bonñik zo a ambân dâzângom ândiban. <sup>8</sup>Den âlipnâ târârakñâ sâna kâsa zen nângâmñâ añun op Yesugât kâmut nen den mân sâm bâlij kwatningâbi.

<sup>9</sup>Kore a dâzângona patârâpziñ zengât den lum kore âlip otziñgâne sâtâre upi. Oi patâ zengât sâtziñan mân sâbi. <sup>10</sup>Oi kâmbu mân op ândim kut nâi nâiziñ yen ek galem upi. Yatâ opnâ Anutu kubikkubikniñ diñangât neule âlip upi.

#### Sañgon kubikniñgipkât ândiândi âlipnâ ândinat.

<sup>11</sup>A hân dâp âlip utnatkât Anutugâren gâbâ tânzângozângonâ, zo muyageip. <sup>12</sup>Zorânâ betniñan mem kubikniñgi um kâtik zengât ândiândi sot sâkkât âkñâlê bâlijâ zo birâm ziren kendonbandon ândim Anutu zikñâ yatâ târârakñâ op

ândinat. <sup>13</sup>Yatâ ândim Anutu patâ sot kubikkubikniñâ Yesu Kristo, zâkkât neule âsakñâ muyagei ândiândi âliprjan âinatkat um bâbâlañ op nângâm ândinat. <sup>14</sup>Zâkñâ neñgât suupniñ mem bâlijan gâbâ mâkâningip. Oi zâkkât arâprñ op oññâ âliprjanğât nep tuum ândinatkat sanjon kubikniñgip. <sup>15</sup>Gâ den zo dâzângom kubikziñgâm kâtigiban. A ziñ gâgât nângâne giginjâ mân upap.

### **Tirik Kaapumgâren gâbâ a uñakñâ âsagiwen.**

**3** <sup>1</sup>Gâ a ambân Yesugât kâmurân ândie, zen dâzângona a kutâ sot zâizâiñ hurat kwatziñgâm dinziñ lubi. Oi nep âlip top topñâ ziap, zo bâbâlañ op tuubi. <sup>2</sup>Oi sâm bâliñ kwâkwat sot den sârek mân sâbi. Buñ kâtikñâ. Zen lumbeñ ândim a pisuk umâlep kwatziñgâbi.

<sup>3</sup>Nen mârumjan um gulip op den kom ândiwenñâ âkñâle top top, zorat kore op kuk sot um kâlak muyagem um kâsa op ândiwen. Nen yatâ op ândeindâ a ziñâ neñgât âkñâle mân op ândiwe. <sup>4</sup>Ka Anutuñâ umñandâ gâsânângomñâ kubikniñgip. <sup>5</sup>Nen târârak ândim nep âliprñâ ñâi tuuwengât buñâ. Um lâklâkñanğât op too sanjonniñgâm sâi Tirik Kaapumñâ ândiândi uñakñâ niñgip. <sup>6</sup>Zâk kubikkubikniñâ Yesu Kristogât opñâ Kaapum niñgip. Zo bituktâ mân niñgip. <sup>7</sup>Zo nen Anutugât mâteñan tosanin buñ kinñâ ândiândi kâtikkât sinji utnatkat yatâ otniñgip. Um lâklâkñanğât op yatâ otniñgip. Den zo perâkñak.

### **Den bon buñ, zo birâbi.**

<sup>8</sup>Gâ itâ dâzângom kâtigem ândiban. “Anutu nângâm pâlâtân kwapmeñâ âliprjanğât nep tuum kâtigibi. Nep âliprñâ zo tuune a betziñan mimbab. Yatâ op ândine âlip upap.

<sup>9</sup>A zen den yen âragume, zo kândâtkubi. Sâkurâpziñ kutziñanğât den sot den sâm kwâkâyanğame sot den kâtikkât den sârek zo birâbi. Den top top zo yen, bon buñâ.”

<sup>10</sup>A ñâi den sâi kâsâpagome, zo sâp kânok mo zagât dukuna mân nâñgi birânjanğana zikñik ândibap. <sup>11</sup>Gâ nângat. A yatâ zo bâlijanğât nep tuumap. Orot mâmeñandâ tosanñâ sâm muyagemap.

### **Den murukñâ.**

<sup>12</sup>Nâ Atemis mo Tikiko sângongua gâgâren gâi Nikopoli kamânân ga muyageniban. Nâ kamân zoren map narâkñan ândibat san.

<sup>13</sup>Apolo sot gurumin den nângânângâ a Zena, zet sângonzâkona hân ñâin âibabot. Mâtâpkât nalem zikâna mân kwakpabot.

<sup>14</sup>Kâmut gakârâpniñâ zen âliprjanğât nep tuum umziñ upap. Oi a nâmbutñâ pu utne betziñan mine nepziñâ zo bon upap.

<sup>15</sup>A nâ sot ândime, zen aksik gâ nângâgige. Gâgâren a buku otniñgâme, zorat sot den dâzângoban.

Kembugâren gâbâ tânzângozângon, zorân zengâren zimbab. Zo yatik.